

Avon 100 onns - Las emprema soras da Glion van ella missiun chinesa

Ils 7 d'october 1920 – pia avon 100 onns – han las empremas siat soras dominicanas priu cumiau dalla claustra a Glion ed ein serendidas ellas missiuns en China. Lur superiura era sora Thomasa Monn, da Cumpadials. Ensemen cun paders dominicans han ellas ughegiu da fundar in'ovra missiunara en China. Denter ellas secattavan era ils dus fargliuns: pader Ludovic Paly, da Cumpadials, e sora Carmelina.

Fundau ed aviert la missiun en China

Tgei ughetg che quei ei stau da fundar – naven dalla Surselva – a Shanghang e sis ulteriuras staziuns a Fukien (oz Fujian) en China. Ei ha daveras duvrau gronda carezia tier Cristus per derasar leuen sia buna nova, mo era spért da pionier per insumma riscar in tal pass. Mo ei correspundeva dil tutfatg agl intent dalla fundaziun a Glion da segidar e far dil bien cun tuts carstgauns senza distinguer denter naziun e religiun e segidar, nua ch'il basegns fuva il pli grond.

Instituìu la procura da missiun

Per che la missiun reusseschi eisi stau dad endrizzar igl emprem ina procura per las missiuns cun lur stamparias – aschia era a Glion. Inaga era ei d'organisar ils viadis ellas missiuns ed era finanzia tut quei. Mo lu fuvu ei era d'organisar en plirs loghens viadis, colligiai cun priedis, procurar per stampats, tschercar il contact cun giuvens carstgauns e cerchels interessai, svegliar igl entusiassem per las missiuns ed instituir in'uniun d'amitgs e fauturs che sustenevan finanziaimein la missiun.

En survetsch dalla tgira, d'affons e surtut da dunnas

Ellas staziuns principalas a Shanghang e Wuping ein las soras da Glion s'occupadas cun ils malsauns sco cun l'apoteca per paupra glied, la tgira ambulonta e visetas a casa, mo era dalla giuventetgna (scolar) e specialmein ver quita pastoral per las dunnas. Quellas vevan la tresta sort d'esser „sclavas“ dils umens. En las duas casas Infantia ein las soras s'occupadas cun biars affonets ch'ins veva semplamein surschau ad ellas tras metter ora els. Pli tard era ei affonets buca giavischai, pilpli buobas u impedi. Quels affons anflai – per temps deva ei tochen 90 – ein carschi si tier las soras ed era vegni scolai dad ellas en biars graus. Igl agid social-pastoral dallas soras ha augmentau fidonza e speranza viceversa.

Stau a fin en China suenter 40 onns

Deplorablamein ei igl engaschi missiuneric dallas soras da Glion en China staus a fin suenter rodund 40 onns, cu ils communists ein vegni alla pussonza en quella tiara e tut ha stuiu vegnir interrut abruptamein. Pader Ludovic Paly ei vegnius 1933, cun mo 37 onns crudeivlamein per la veta tras terrorists e daventaus igl emprem marter dalla missiun da Glion. 1954 ei igl uorden dils dominicans vegnius bandischaus ord China.

Cuort sissu ei igl uorden da s. Dumeni denton sedomiciliaus sin l'insla Formosa (oz Taiwan). Las bunas enonuschienschas dil lungatg chines han possibilitau a dominicanas e dominicans da cuntinuar cun lur lavur el sid da Formosa. Leu han las soras endrizzau numerusas scolettas ed ein

daventadas catechetas ellas pleivs. Igl ei buca iu ditg tochen che giuvnas dunnas da Formosa ein entradas ella congregaziun dallas soras missiunaras da Glion. Ellas han surpriu ils onns suenter – ed aunc adina – la direcziun e responsabladad per nossa cuminonza a Taiwan. Consorras a Taiwan ein returnadas pli tard en China per gidar giuvnas soras a fundar leu ina congregaziun.

Serendidas 1952 en Brasilia

Sin in tut auter clom ha la congregaziun da Glion rispundiu 1952 cun tarmetter treis soras da leu cul bastiment naven da Genua en Brasilia. Sin giavisch dalla Caritas svizra han ellas giu quitau da 500 famiglias tudestgas ch'eran serendidas e sedomiciliadas els territoris da Guarapuava /Paraná. Las soras han instruiu ils affons e giu quitau dils malsauns.

Suenter che la situaziun ellas famiglias tudestgas era seconsolidada, ein las soras sefatschentadas cun surmuntar la miseria dalla populaziun brasiliana tras segidar cun affons, malsauns, dunnauns, attempai, paupers purs e giuvenils. Quei ei succediu tras realisar divers projects social-diaconics. Vegnidas sustenidas ein las soras missiunaras da Glion era tras numerusas consoras brasilianas. Quellas han surpriu la responsabladad pils projects ed ein adina vegnidas sustenidas dalla procura a Glion tras fauturs. Era la regiun Brasilia dallas soras dominicanas a Glion vegn ussa tgamunada da soras indigenas.

Bia ei bein semidau, mo il spért missiunaric ei restaus. Las soras en Brasilia han cattaun pli tard lur missiun el pauper nord-ost da quella tiara. Las numerusas canortas per affonets a Teresina ein in mussament da success persuenter.

L'incarica dominicana resta

Oz san las soras da Glion ch'ellas ston definir da niev l'incarica missiunara muort las grondas midadas el mund ed ella Baseldgia. En tgei miseria spetgan ins uss agid dad ellas? Nua ei quei pusseivel? Il liug d'engaschi sa esser dapertut. Per survir al proxim ston ins nuota pli traversar igl Ocean.

Mintgacass astgan ins constatar che la procura dalla missiun a Glion, ch'exista dapi 100 onns, ei tuttavia buca stauncla. Ella fuorma aunc adina il center d'ina vasta reit solidarica. D'ina vart levgiescha quei da sustener e da l'autra vart era da porscher a biars affons e giuvenils en paupradad, cun fomaz e munconza da scolaziun in avegnir plein speranza. La finamira ei vinavon da schar percorscher la carezia da Diu cun far dil bien.

Translatau: Giusep Capaul

Ilanz, 15.9.2020

www.missionsprokur.ch